



Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiunneqarnissaanik Inatsisartut aalajangiiffigisassaattut siunnersuut. Ilinniarfiusinnaasutut suliffiusinnaasutullu piukkunnaatillit qanoq tapersorsorneqartiginerannik aammalu inunnit pineqartunit inuiaqatigiinnillu pisariaqarneratut atorineqartiginerannik erseqqinnerusumik qulaajaanermik misissuineq imaqassaaq, soorlutaaq misissuineq innarluutillit ilinniartitaanerannut suliffeqarneranullu tunngasumik siunissami ilisimasaqalernissamut qulakkeerinnittumik aalajangiisoqarneranik malitseqartinneqassasoq.

(Inatsisartunut ilaasortaq Aqqa Samuelson, Inuit Ataqatigiit).

Tunngavilersuut:

Inuit Ataqatigiit Nunatsinni inuit innarluutillit illersorneqarnissaat inuiaqatigiit ingerlanneqarneranni ersarissumik pingaartuutinneqartuarnissaat atugassarititaasullu siuarsaavigineqartuarnissaat sulissutigiarumavaat, taamaaliornikkut innarluutillit pisinnaatitaaffiisa periarfissaasalu innuttaasunut innarluuteqanngitsut pisinnaatitaaffiitut sapinngisamik assigiinnerunissaat qulakkeerniarlugu.

Inuit innarluutillit pisinnaatitaaffii 2006-mi Naalagaaffiit Peqatigiit aalajangersagaanni nunatsinnilu atuutilersissimasarput aallaavigalugu, inuit innarluutillit ilinniagaqarnissamut aammalu suliffeqarnissamut pisinnaatitaaffeqarnerat aalajangersarneqarpoq. Inuit innarluutillit pissutsit piginnaasakinnerulersimanerminnut tunngasut pissutigalugit, ilinniakkamik ingerlataqarnissamut suliffeqarnissamullu pisinnaanngivissortut illersugaaajuassapput. Inuit innarluutillit ilinniakkamik ingerlataqarnissamut suliffeqarnissamullu timikkut tarnikkullu atukkat killiliisimappata tamanna ataqqilluinnarneqassaaq. Pingaartuuvorli inuit innarluutillit inuttut naleqarnerat ataqqillugu illersorneqarnissaat, isumassortariaqavissortullu ikiortariaqarfimmikkut ikiorneqassallutik.

Inuit innarluutillit inuiaqatigiinni allatuulli pisinnaataaffeqarput. Taamaattumik inuit innarluutillit allatuulli assigiimmik pineqarlutik periarfissaqartitaassasut Inuit Ataqatigiit pingaartippaat.

Inuit innarluutillit nakkutigineqarnerat nukittorsarumallugu, inuit innarluutillit ilinniartitaanerat suliffeqarnerallu pillugit Naalakkersuisut misissuisariaqarnerat nalunaarusiortariaqarnerallu pissutissaqarluortoq Inuit Ataqatigiit isumaqarput.

INUIT ATAQATIGIIT

Inatsisartuni



Inuit innarluutillit ilinniartitaanerat suliffeqarnerallu pillugit §37 naapertorlugu Naalakkersuisunut apeqquteqaatit akissutaanni¹ ilaatigut inuit innarluutillit ilinniartitaanerat suliffeqarnerallu Aatsitassanut Suliffeqarnermullu Naalakkersuisoqarfimmi immikkut nalunaarsugaanngillat.

Inuit innarluutillit nakkutigineqarnerat isumassorneqarnerallu pitsaanerusoq anguneqassapat, inuit innarluutillit ilinniartitaanerannut suliffeqarnerannullu tunngasunik paasissutissanik sukumiisunik peqartariaqartugut Inuit Ataqatigiit isumaqarpugut.

Nunatsinni inuit innarluutillit ilinniartitaanerisa suliffeqarnerisalu misissuiffigineqarnissaannut nalunaarusiorneqarnissaannullu Naalakkersuisoqarfiit akimorlugit, kommunit, Tilioq, Pissassarfik susassaqtullu allat ilanngunneqarnissaat kaammattuutigerusupparput.

Taamatut oqaaseqarluta siunnersuut Inatsisartunut suliassanngortipparput.

Pisortanut aningaasatigut allaffissornikkullu kingunerisassai:

Inuit innarluutillit ilinniartitaanerat suliffeqarnerallu pillugit misissuineq nalunaarusiornerlu AC-fuldmægtigip ukioq ataaseq sulineranik naleqartussatut missingerneqarpoq, tassa 500.000 kr.-it missaannik. Aningaasanut taakkununga ilaassapput nutserineq, naqiterineq, aammalu misissuisimanagerup nalunaarusiallu saqqummiunneqarnera. Nalunaarusiaq inuit innarluutillit nakkutigineqarnerannut nukittorsaassasoq naatsorsuutigineqarpoq, siunissamilu inuit innarluutillit ilinniartitaanerisa suliffeqarnerisalu pitsanngorsarnissaanut atorluarsinnaassalluni. Taamaattumik nalunaarusiaq siunissaq eqqarsaatigalugu imminut akilersinnaalluassaaq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.

¹ https://ina.gl/documents/para3637/2018/svar/320_2018_handicappede_AQOS_kal_akissut.pdf